

BON DIA *Aruba*

bondia.aruba@gmail.com

*Dolarisacion di Corsou:***Si no tin problema cu moneda actual, pakico cambi'é**

WILLEMSTAD - E dicho ta realmente un dicho Mericano cu den su version completo ta bisa asina aki: “If it ain’t broken, don’t fix it”. Loke e dicho ey kier men ta, cu ora bo pone un sistema nobo na luga di un sistema cu tabata funciona bon, bo ta realmente crea un problema cu ta bay duna bo hopi dolor di cabes.

Emsley Tromp, cu ta e presidente director di Banco Central di Corsou y St. Maarten, ultimamente ta propaga dolarisacion di Corsou. Pero acaso e sistema monetario di Corsou ta ‘broken’? asina Hitzig Bazur, conocido ciudadano ta opina. Si no ta asina, anto no ta necesario pa ‘fix’ e tampoco y cu esey so caba henter e idea di dolarisacion no ta necesario di ningun manera. E hecho cu Antia a plama for di otro recientemente, tampoco ta constitui un rason pa introduci un sistema monetario nobo of cu

otro palabra, no tin motibo pa dolarisacion, Bazur ta sigui bisa.

Pa splica esaki un poco mas miho, laga nos wak e desaroyo na Europa y dicon nan si a haña necesario na dado momento pa bin cu un structura monetario nobo. Na Europa e cos a cuminsa cu formacion di BENELUX, e cooperacion economico entre Belgica, Nederland y Luxemburg.

Pronto e cooperacion fructifero aki entre e tres paisnan masha chikito aki a hala atencion di entre otro Alemania y Francia, kendenan hunto cu BENELUX y Italia a forma primeramente EGKS cu pronto a cambia bira EEG. Te awe Corsou tin e asina yama EEG-weg, cu ta comunica Pater Eeuwensweg cu e rotonde di Zegu como un recuerdo di e organizacion aki cu ya no ta existi mas, Bazur a trece dilanti.

Den e decada 1990, e paisnan

cu tabata forma EEG a sigui intensiva nan cooperacion den direccion di un organizacion pa cua nan a saca inspiracion for di e manera cu Merca ta construi, esta Union Europeo. For di esaki nan a traha pa yega na un moneda nobo cu lo a reemplasa tur e monedanan individual y solucionan di e manera ei e complexidad di nan transaccionnan financiero. E moneda ey a bira e Euro.

Den tempo cu a forma Antias sinembargo, no a haña necesario pa bin cu henter un sistema monetario nobo pa e pais nobo. Tabata suficiente pa uza e florin di Corsou.

E unico accion necesario tabata un cambio di nomber di florin di Corsou pa florin di Antias Hulandes. Cuminsando for di 1 juli 1980 a pasa pa saca tur moneda cu a sobra cu e titulo ‘Moneda di Corsou’ for di circulacion. Tur esaki pues no ta dje tanto aña pasa.



For di esaki por realisa, cu e union entre Corsou y Sint Maarten no tin mester di e moneda Caribense. Ta masha bon posibel pa sigui uza e moneda di Antias como e moneda intermediario entre e situacion actual y e desaroyo cu lo por sigui aki rato, esta e desaroyo caminda cu Sint Maarten lo por opta pa pone su situacion monetario oficial na e mesun altura cu e practica monetario di e isla, esta uzo general di dollar pa paga cune.

Ora cu Corsou keda su so, nos lo por cambia e nomber di e florin di Antias atrobe pa e florin di Corsou. Of kisas un cooperacion cu Aruba tambe ta posibel, segun Hitzig Bazur. Importante ta cu ta elimina e fase di florin Caribense, loke ta spaar hopi placa. Dolarisacion no ta necesario tampoco pa motibo di e hecho cu florin tin un relacion di cambio fiho cu dollar. Tempo cu a lanta IMF (Fondo Monetario Internacional) riba 18 di de-

cember 1946, a fiha e paridad di florin na 0,471230 gram di oro. Awendia e paridad aki a devalua bira 0,411543. E paridad di 1946 a nifica cu florin Antiano a bin cay na 0.530264 dollar pa un florin o sea 1.88585 florin pa un dollar. Na december 1971, tempo cu a revisa e relacionnan valutario general internacional, gobierno di Antias a fiha e paridad di cambio di dollar pa florin na 1.7900. Esaki no a cambia te hasta awe. Ora cu dollar a devalua na februari 1973, gobierno a dicidi pa mantene e paridad na 1,7900 florin.

Apesar di e paridad aki, laga nos yam’e un florin dolarisa) pero dor di e independensia di e florin, e autoridadnan monetario di Corsou, tin e posibilidad pa hasi maneho independiente riba diverso tereno financiero, monetario y economico di gran importancia pa Corsou, los di e maneho di e sistema di banco central Mericano, Bazur ta termina su analisis.